


IN MEMORIAM

KURTOVIĆ MESUD - Menso



1. aprila 1983. godine iznenadna smrt otrgla je iz naše sredine pregalaca geodetske struke, dragog kolegu i humanog čovjeka druga Mensu.

Kurtović Mesud, geometar-pravnik rođen je 1926. godine u Trebinju od ugledne i napredne porodice.

Iz generacije je koja je svoje dječastvo i mladost počela bezazleno da razvija pored Trebišnjice i pod toplim Hercegovačkim suncem, čiji je normalan razvoj grubo prekinuo rat. Bio je aktivni borac NOV-a, zamjenivši knjigu sa puškom i bombom, i tako kao golobradi mladić doprinosi da neprijatelj bude što prije istjeran iz naše zemlje.

Osam razreda gimnazije završio je u svom Trebinju odmah nakon rata 1947. godine kada polaže i ispit zrelosti (veliku maturu).

Diplomirao je geodetsku-tehničku školu 1949. godine u prvoj generaciji u oslobodjenoj zemlji. Odmah nakon završetka škole dobiva teške i odgovorne zadatke na izgradnji Novog Travnika.

Tu je naš Menso iskazao svoje stručne i organizacione sposobnosti, zbog čega je više puta pohvaljivan i nagrađivan.

Kasnije, kao izrastao sa već bogatim životnim i radnim iskustvom dolazi u svoje Trebinje u katastar, gdje se također afirmiše kao dobar organizator i budući rukovodilac, te organizuje savremenu geodetsku službu u opštini, kojoj je za trajno utisnuo svoj stručni i lični pečat i time direktno doprineo bržem razvoju grada Trebinja.

Pored stručnih i društvenih obaveza na radnom mjestu, bio je aktivan sportista nogometnog kluba "Leotar" i strastveni ribolovac na tihoj i istojoj kao suza Trebišnjici.

Ugradio je sebe u napredak i razvoj geodetske struke koju je povezao sa imovinsko-pravnom naukom sticajući uz rad diplomu pravnika na Pravnog fakultetu u Sarajevu.

Ko ga je poznao i ma kakav dodir sa njim imao, odmah bi došao do zaključka da je besprekorno pedantan, uredan i odmjeran, nenametljiv, koroman i pošten. U svom poslu uvijek je želio i više od mogućnosti, bolje, ljepše i kvalitetnije, sadržajnije i tačnije.

U svom dugogodišnjem iskustvu, obavljajući svoj naporan posao, upoznao je mnoge krajeve i ljude, i u tom dodiru sa narodom, pobrao je mnoge njegove vrline, osjećaj za pravdom, nacionalnoj ravnopravnosti, patriotizmu i te divne osobine prenosio na mladje. Istovremeno je stvarao sa

svojom vjernom i odanom suprugom Mirom i svoju porodicu, kojoj je do kraja ostao privržen, kao divan otac i pažljiv suprug.

Kada je trebalo da predahne, uživajući plodove svog bogatog života i rada zdravlje mu je sve nagriženije i došao je trenutak, koji je grubo prekinuo jedan nada sve bogat i pošten ljudski život, tako da se slobodno za njega može reći, da je od prevelikog poštenja prije vremena umro.

Smrt ga je zatekla na dužnosti DIREKTORA - OPŠTINSKE GEODETSKE UPRAVE TREBINJE.

Za sve što je dao, za vrline čovjeka i stručnjaka, neka je VJEĆNA SLAVA I HVALA, kolegi MESUDU KURTOVIĆU - Mensu.

Ismet Sadović